



Broj:  
Sarajevo, 12. VIII 2004.

MEDIJIMA

Predmet: Informacija

AGENCIJA ZA BANKARSTVO FBiH

Štednja 1,86 milijardi KM

Štedni ulozi građana u Federaciji BiH dostigli su 30. juna iznos od 1,86 milijardi konvertibilnih maraka što je za 191 milion ili 11,4 % više u odnosu na kraj prošle godine. Prema podacima koje je iz 26 banaka prikupila Agencija za bankarstvo FBiH, ukupni depoziti krajem juna iznosili su 4,86 milijardi KM što je za 566 miliona ili 13% više nego na isteku prošle godine.

Analiza kretanja štednje u Federaciji BiH pokazuje da je rast uloga koje građani povjeravaju bankama stabilan i umjeren, nakon kraja 2001. godine kada je, u vrijeme uvođenja eura, došlo do "eksplozije" štednje koja je u kratkom periodu skoro utrostručena. Na kraju 2000. godine građani su u bankama držali 462 miliona KM, tokom naredne godine zabilježen je skok na 1.314 miliona, da bi u 2002. godini štednja iznosila 1.436 miliona, u 2003. godini 1.666 miliona, a tokom šest prvih mjeseci ove godine dostigla je 1.857 miliona.

Na isteku juna, banke evidentiraju 3,95 milijardi KM odobrenih kredita, odnosno povećanje od 505 miliona u odnosu na kraj prošle godine. U ukupnom portfelju, krediti građanima iznose 1,93 milijardi ili 48,8%, privatnim preduzećima 1,70 milijardi ili 43,1%, a javnim preduzećima 200 miliona ili 5%. Posmatrano u odnosu na kraj prošle godine, krediti građanima porasli su za 17, a privatnim preduzećima za 16%. Praktično, iznos kredita stanovništvu približno je jednak ukupnoj štednji, dok su privatna preduzeća koristila kredite čiji je iznos 2,5 puta veći od vrijednosti depozita koje drže u bankama.

Ured FBA za informisanje

Ibrahim Polimac